

国朝耆献类征初编

國朝著獻類征初編

國朝耆獻類徵初編卷四百四十九目錄

卓行七

謝聘

吳世杰

劉首昂

胡一玠

蘇呈祥

唐祁

王萬禩

沈幼升

陰長庚

沈之璘

錢標初

蔣維城

蔣德峻

郭允觀

韓光曉

彭萬崑

龐克愼

楊可需

吳爾襄

李生春

陳孟壯

萬玉

嚴篤葦

嚴玉人

國朝耆獻類徵初編卷四百四十九

通奉大夫前署江西巡撫江西布政使司布政使湘陰李桓輯

卓行七

謝聘

瑞金孝廉謝君鏃礪名行有名當世書升之日予忝爲分考官事予也最親而謹卒於戊辰得年僅五十予過其家哭之慟諸孤重捷等泣而請銘蓋逡巡不忍執筆葬有期諸孤再申前請語益悲乃攬淚而志之曰嗚呼此故孝廉志尹謝先生之墓也君謝姓諱聘字志尹庚號莘園先籍維揚元時遠祖宣郎官虔之興國因家焉明洪武初始遷瑞金爲望族高祖乾道起家思恩縣令思恩生

元璇元璇生長震皆隸庠序長震儒者守義不屈於盜學者私謚
爲義烈先生義烈生二子次爲君父命爵娶鍾孺人是生孝廉孝
廉有異徵七歲侍曾大父讀易至太極生兩儀君起問太極又爲
誰生曾大父奇其意徧贊賓客謂他日大吾門者必此子也家固
世貴遭寇變遂中落君嘗爲予言十八九歲時從南州先輩伍公
達可學蚤出暮歸率虛腹而往夜就同舍生映鐙而讀同舍生謂
飯後宜少閒適毋遽高誦能傷人不知某尙未嘗晨炊也其寒苦
力學如此應童子試學使楊公兆魯亟賞君文拔第一歲癸卯遂
舉於鄉年纔二十有六甲辰公車北上禮部吏誤落君名不得與
試事聞今皇上赫然震怒疑爲怨家裁抑從邸舍中急索君

值君先期出都遣吏部員外郎喇畢馳驛 召君赴 闕質對議
削諸司事官籍立授君官有以乘時建樹說君者時贈公偕行父
子閒私相勉戒謂我輩出處自有本末若擠人干進何以仰對神
明詣部立白司事官無他實出吏胥一時絀誤司事官槩行免罪
謫又奉 旨開軒特試設主考分考如例當事故以微疵乙君卷
君亦無幾微見顏色初進寒生一旦遭逢異數名動 至尊旁觀
者擬君貴在旦夕而君秉道直躬儼然守三公不易之介繼六上
春官不第詣銓部試高等當除大令需次就選而君沒矣君饒經
濟邑有大事就君計片詞立解甲寅乙卯閒閩變起汀協將劉應
麟據城以叛瑞金去汀纔七十里賊日夜朵頤猝擁眾萬餘度嶺

男女趨避不暇君設計多方應麟竟結營郭外卒保合邑無恐又密約紳士告急贛城及附近甯都守將各馳師援勦應麟亦遂遁歸君沒之日喪車就道邑人欲撤市改服報君恩萬一亦可知君德在人而邑人感君死生如一日也君性孝友周給三黨不以有無爲解贈公病累年君侍湯藥不去左右事母夫人依依如孺子及君疾垂殆母夫人就席摩撫猶強起爲好語安慰曰兒病無害不三日卽起矣獨私語醫者吾病必不治幸毋語吾兒恐傷老母心悲夫恐一旦不諱重傷母心而卒不能延有盡之生終遺太夫人以無窮之戚謂德可以回天徒虛語耳君學期於近道才足以濟時曾不得一竟其用遂使齋志而亡此予所不忍銘君而又不

忍不銘終欲冀君有傳於後世也君生崇禎戊寅五月十一日卒
康熙戊辰五月十四日元配楊孺人男子四皆孝友能文章長重
捷次重拔俱邑廩生次重輝邑庠生次重揚邑增生女子二長適
予姪庠生黎祚遠次許字邑庠生劉君敬問子耀祖孫四衍詩捷
出衍易拔出衍禮捷出衍書揮出孫女四俱幼以康熙二十八年
十月十七日葬於某處耐先隴之某處首某趾某銘曰
千將耶故缺諸剛卯耶故剗諸蒼蒼耶吾曷從而究圖君無恫耶
永厥居上耶出入隨帝車手挾天章護諸雛

右墓誌銘黎士宏撰

吳世杰

余讀宋史至陳同甫傳未嘗不掩卷太息也同甫修皇帝王霸之學以經濟自負數抗論天下事遭讒負謗百折不挫家僅中產畸人寒士衣食之久不衰及晚得一第將赴官一夕卒竟不及設施君子惜之今視吳君萬子何相似也君諱世杰萬子其字登康熙乙丑進士幼磊落不羣博通經史有大志家世住秦郵爲南北孔道輪蹄往來不絕甲寅以後三逆旣平官軍凱旋婦女被俘過者甚眾君方束裝入都所攜資斧三百餘金盡出以贖之不足則又徧告諸薦紳富商諸難婦得復完聚者數百人又其州治西當湖水之衝東南海口沙淤故道水不得洩君惄然憂之庚申水大至

南北閭閻俱決城中水深數尺老幼淪溺君與鄉先生率諸壯者
身立水中壞所置房若干舍爲堙塞具全活數萬人乙丑水復大
至暴風雨三日夜平地涌起數丈村落漂沒浮齒蔽波民或登樹
杪騎屋脊以避稍久卽漂去君倉卒聞多賃小舟徧赴拯救水勢
稍止卽瘞流屍無算因上書大中丞請振大中丞亟馳疏入告置
廠餉之其有就食揚州舍於河干席屋土門上蒸下溼癘疫交作
君復製藥餌市米麥以給之不能歸者置大舟送還故土其始終
周切如此旣而州民甚貧苦役重有公正排年等名皆弊叢也去
之可歲省費鉅萬計時睢州湯公爲巡撫君上書以請湯公悉從
之州民賴焉他若恤冤囚旌烈婦力可爲者不勝枚舉蓋君初舉

孝廉卽誓於神曰其有桑梓弗恤而干謁以爲封殖計者神其鑒之故人皆信君無他也嗚呼世之士大夫遇鄉邦有急難不一引手救曰此非吾責若而人者使當其責亦未必有濟今視君爲何如耶君不意於康熙戊辰七月十七日卒年僅四十有八未試一官怫鬱以終天何生才之難而得展其才之尤難乎君曾祖某祖某父某 封翰林院庶吉士世有隱德有弟三人世熹操家政世烈拔貢生世熹翰林院編修元配夏氏子二遇登遇泰皆側室某氏出君事父母孝教二弟爲文章有盛名所著詩文援論古今關切時務皆爲有用之言余嘗讀其論董仲舒一篇謂後世戡亂定太平類皆奇才傑士無一儒者與其閒而所謂儒者不過高談性

命辨學術異同苟當國家危難嫌疑惟知潔身合道誼必不肖權
宜以救當世之急而除後日之患極推有明王新建爲諸儒中傑
然者又何其與陳同甫見聖賢之精微常流行於世物儒者失其
指趣不能以開物成務其議論相彷彿也君將葬編修以狀來請
銘銘曰

天吳九首蕩覽湖孤城欲沈君奮呼捍隄操舟拯萬夫有才不得
一發攄齋志怫鬱歸冥途或者身挾蛟龍超俯視秦郵奠厥居君
其庶幾歸來乎

右墓誌銘范光陽撰

劉首昂

先生姓劉諱首昂字閭客江右安福人世爲安福右族少負氣喜
談兵生值明季歲甲申流賊破京師明年乙酉王師下江南時
天下未平草寇竊發有逆僕某糾亂兵數千據山谷叫號殺奪死
傷者夥劉氏祖廟被燔先生奉母奔竄負創幾死賴救免少愈奮
泣曰我家祖廟旣毀族黨不保何生爲若不勦畔逆復祖宗仇非
人也刺血書狀號於閤臣楊公公憐之發兵二千往勦頓師六日
徵餉迫促無應者幾激變先生傾家籲族屬供餉晝夜督率數瀕
於危始髮櫛而草薶之揃刈奸慝復我宗族修祖廟安神主爰復
舊觀方逆之旣勦也喜事者以脅從未殄乘先生往詣閤臣駢集

拘係欲置之死人心復搖先生聞之急馳歸釋索縛縱之去眾心帖然後折節讀書籍學宮食餼絃誦暇仍講擊刺戰陣法眾嗤之先生曰將有所用之也未幾果有逆藩之變逆藩者吳三桂也康熙甲寅反滇南勢連江右吉州降附郡縣響應人多恒擾謀附之以緩禍先生矢於眾曰吳逆既不殉明又畔本朝不忠之尤者彼行授首柰何昧心應之眾皆曰然又曰方今勢窮蹙徒困守無益爲目前計練鄉勇樹柵欄置火器結四方鄉兵爲援計無急於此者眾皆曰然遂一一行之已而僞帥劉集統五千人薄近邨將會兵攻吉安先生合鄉兵迎敵迫於險幾爲賊禽賊中有反戈刺其將墜馬者詰其人卽前所釋脅從中一人也遂乘勢追逐戮殿

者數賊僞帥退然終譌言朋起日夕數驚先生曰此詭計搖我志耳守益堅一夕有僞帥遣人至曰從我當得大官授剗爲券否則屠遠近如雞豚從爾家先生叱縛其人遞送大府戮之又一夕盡燒邨前積薪煙燄蔽天先生誠曰無動率靜以待之眾寇偏發礮石轟擊乃遁去後屢至屢卻寇不敢窺當是時妖氛方熾人心蒼黃其不靡然從風者罕矣乃一夫之志屹然山立奪眾論冒九死卒能保全遠近申明順逆秉忠義者素也丁巳 王師復吉江右漸次平凡有扞禦功者皆授官先生功爲同姓武弁攘去沈晦恥自言有代爲陳者不報後循例以歲貢生終嗟夫人才不易得而廟堂又急於需才今有其人又有其功而卒使之鬱塞以老此